

ქალაქ ბათუმის მუნიციპალიტეტის საკრებულოს

დადგენილება N

ქ. ბათუმი _____ იანვარი, 2026 წელი

„ქ. ბათუმის მუნიციპალიტეტში დასახლებული ტერიტორიის დასუფთავებისათვის მოსაკრებლის შემოღების და გადახდის ინსტრუქციის დამტკიცების შესახებ“ ქალაქ ბათუმის მუნიციპალიტეტის საკრებულოს 2016 წლის 29 იანვრის №3 დადგენილებაში ცვლილების შეტანის თაობაზე

„ნორმატიული აქტების შესახებ“ საქართველოს ორგანული კანონის მე-20 მუხლის მე-4 პუნქტის შესაბამისად, ქალაქ ბათუმის მუნიციპალიტეტის საკრებულო ა დ გ ე ნ ს :

მუხლი 1

„ქ. ბათუმის მუნიციპალიტეტში დასახლებული ტერიტორიის დასუფთავებისათვის მოსაკრებლის შემოღების და გადახდის ინსტრუქციის დამტკიცების შესახებ“ ქალაქ ბათუმის მუნიციპალიტეტის საკრებულოს 2016 წლის 29 იანვრის №3 დადგენილებაში (გამოქვეყნების წყარო: საქართველოს საკანონმდებლო მაცნე, www.matsne.gov.ge, გამოქვეყნების თარიღი: 05/02/2016, სარეგისტრაციო კოდი: 010250050.35.132.016286) შეტანილ იქნას შემდეგი ცვლილება:

1. დადგენილების პირველი მუხლით დამტკიცებული დანართი 1 ჩამოყალიბდეს ამ დადგენილებაზე თანდართული რედაქციით.

2. დადგენილების მე-2 მუხლის პირველი პუნქტით დამტკიცებული დანართი 2 ჩამოყალიბდეს ამ დადგენილებაზე თანდართული რედაქციით.

მუხლი 2

დადგენილება ამოქმედდეს გამოქვეყნებისთანავე.

საკრებულოს თავმჯდომარე

ივანე მაისურაძე

ინსტრუქცია

ქალაქ ბათუმის მუნიციპალიტეტის ტერიტორიაზე დასახლებული ტერიტორიის დასუფთავებისათვის შემოღებული ადგილობრივი მოსაკრებლის გამოანგარიშებისა და გადახდის შესახებ

მუხლი 1. ზოგადი ნაწილი

1. ინსტრუქცია შემუშავებულია საქართველოს ორგანული კანონის „ადგილობრივი თვითმმართველობის კოდექსი“ და „ადგილობრივი მოსაკრებლების შესახებ“ საქართველოს კანონის საფუძველზე, იგი განსაზღვრავს ქალაქ ბათუმის მუნიციპალიტეტის ტერიტორიაზე ნარჩენების წარმომქმნელთა მიერ დასახლებული ტერიტორიის დასუფთავებისათვის მოსაკრებლის გადახდის წესს.

2. დასახლებული ტერიტორიის დასუფთავება გულისხმობს ქალაქ ბათუმის მუნიციპალიტეტის ტერიტორიის დაგვა-დასუფთავებას და ქალაქ ბათუმის მუნიციპალიტეტის ტერიტორიაზე წარმოქმნილი სხვადასხვა ნარჩენების შეგროვებას, ტრანსპორტირებას, გაუვნებლობასა და მათი განთავსების საბოლოო ადგილების მოვლა-პატრონობას.

3. დასახლებული ტერიტორიის დასუფთავებისათვის მოსაკრებელი (შემდგომში - მოსაკრებელი) წარმოადგენს ქალაქ ბათუმის მუნიციპალიტეტის ადგილობრივი თვითმმართველობის ორგანოს მიერ შესაბამისი უფლებამოსილი პირის მეშვეობით დასახლებული ტერიტორიის დასუფთავებისათვის გაწეული მომსახურებისათვის გათვალისწინებულ აუცილებელ გადასახდელს ადგილობრივი თვითმმართველი ერთეულის ბიუჯეტში.

4. ნარჩენების წარმომქმნელი პირი ვალდებულია მოსაკრებელი გადაიხადოს დადგენილ ვადებში. მოსაკრებლის გადაუხდელობაზე ან/და გადახდის ვადების დარღვევაზე პასუხისმგებლობა განისაზღვრება საქართველოს კანონმდებლობით.

5. ქ. ბათუმის მუნიციპალიტეტის მერიის შესაბამისი სამსახურის (შემდგომში „სამსახური“) ან შესაბამისი უფლების მქონე ოპერატორის (შემდგომში „ოპერატორი“) მიერ განსაზღვრული დროის გარდა მომხმარებლისათვის სასურველ დროს დიდგაბარითიანი ნარჩენების ტრანსპორტირების ხარჯები დაიფარება მომხმარებლის მიერ.

მუხლი 2. ტერმინთა განმარტება

ამ დადგენილების მიზნებისთვის მასში გამოყენებულ ტერმინებს აქვს შემდეგი მნიშვნელობა:

ა) ნარჩენი - ნებისმიერი ნივთიერება ან ნივთი, რომელსაც მფლობელი იშორებს, განზრახული აქვს მოიშოროს ან ვალდებულია მოიშოროს;

ბ) საყოფაცხოვრებო ნარჩენები - დასახლებულ ტერიტორიაზე, საცხოვრებელ ფართზე საყოფაცხოვრებო საქმიანობის შედეგად წარმოქმნილი ნარჩენი და სხვა ნარჩენი, რომლის შემადგენლობა ამ ნარჩენის მსგავსია, აგრეთვე ბათუმის ტერიტორიაზე მოქმედი იურიდიული პირების, ინდივიდუალური მეწარმეების, დაწესებულებების და ორგანიზაციების საქმიანობის შედეგად წარმოქმნილი ანალოგიური ნარჩენები. საყოფაცხოვრებო ნარჩენები არ მოიცავს ფიზიკური პირების მიერ პირადი საჭიროების მიზნით განხორციელებული სამშენებლო ან/და სარემონტო საქმიანობის შედეგად წარმოქმნილ ნარჩენებს;

გ) ნარჩენების წარმომქმნელი - მომხმარებელი, რომლის საქმიანობის შედეგად წარმოიქმნება ნარჩენი;

დ) დიდგაბარითიანი ნარჩენი - ნარჩენები, რომლებიც თავიანთი ზომებისა და ფორმების გამო ვერ თავსდება ნარჩენების სათავსში;

ე) ტერიტორია - დაწესებულებების, ორგანიზაციების, იურიდიული პირების, ინდივიდუალური მეწარმეების და სხვა სუბიექტების ტერიტორია, რომელსაც აქვს ფართობი, საზღვრები, ადგილმდებარეობა, სამართლებრივი სტატუსი და სხვა მახასიათებლები;

ვ) საერთო ფართი (m^2) - საქმიანობისთვის გამოყენებული ფართობი;

ზ) აპარტამენტი - წარმოადგენს საცხოვრებელ ბინას/სახლს, რომელიც განკუთვნილია როგორც საცხოვრებლად, ასევე გასაქირავებლად, გააჩნია ტიპიურ საცხოვრებელ ბინებისგან განსხვავებით დამატებითი სერვისები, აქვს სტუმართა რეგისტრატურა ე.წ. რეცეფცია და ა.შ. ფართის საცხოვრებლად არგამოყენების შემთხვევაში, მფლობელს შეუძლია მმართველი ოპერატორი კომპანიის ან მის გარეშე მოახდინოს ფართის გაქირავება;

თ) ნარჩენების მფლობელი - ფიზიკური პირი, ორგანიზაცია, დაწესებულება, ინდივიდუალური მეწარმე ან სხვა იურიდიული პირი, რომლის საკუთრებაში არსებულ ტერიტორიაზე განთავსებულია ნარჩენები;

ი) დაგვა-დასუფთავება - მექანიზირებული დაგვა, ხელით დასუფთავება, მორეცხვა, მორწყვა, თოვლცვენის დროს ქუჩების თოვლისგან გასუფთავების ღონისძიებები, მათ შორის, მარილის მოყრა;

კ) მომხმარებელი - ბათუმის დაგვა-დასუფთავებისა და ნარჩენების მართვის მომსახურების მიმღები;

ლ) ოპერატორი - ბათუმის დაგვა-დასუფთავების და ნარჩენების მართვის მომსახურების განმახორციელებელი ინდივიდუალური მეწარმე ან იურიდიული პირი;

მ) აბონენტი - ბათუმის ტერიტორიაზე ნარჩენების წარმომქმნელი ყველა პირი, რომელიც დარეგისტრირებულია მოსაკრებლის გადამხდელად დაგვა-დასუფთავებისა და ნარჩენების მართვის განმახორციელებელ სამსახურში ან ოპერატორთან;

ნ) ნარჩენების დაგროვების ნორმატივი - ერთი კალენდარული წლის განმავლობაში კონკრეტული საქმიანობის განმახორციელებელი ფიზიკური და/ან იურიდიული პირის მიერ წარმოქმნილი კუბური მეტრი (m^3) საყოფაცხოვრებო ნარჩენი;

ო) სულადობა - სახელმწიფო სერვისების განვითარების სააგენტოში კონკრეტულ მისამართზე რეგისტრირებულ პირთა რაოდენობა;

პ) ერთი საწოლი - საავადმყოფოებში პაციენტთა, ხოლო სასტუმროებში მომხმარებელთა ერთი პირისთვის განკუთვნილი საწოლი;

ჟ) ერთი დასაჯდომი ადგილი - კვების ობიექტში მომხმარებელთა ერთი პირისთვის განკუთვნილი ადგილი;

რ) ინდივიდუალური საცხოვრებელი სახლი - ერთბინიანი ან/და ორბინიანი (მათ შორის, ბლოკირებული სახით), ცალკე მდგომი, არა უმეტეს სამი მიწისზედა სართულის (მანსარდის გარდა) მქონე საცხოვრებელი ფუნქციის შენობა, რომელიც განკუთვნილია ერთი ან ორი ოჯახისათვის.

მუხლი 3. მოსაკრებლის გადამხდელი

1. მოსაკრებლების გადამხდელები არიან ფიზიკური ან/და იურიდიული პირები, ორგანიზაციები და დაწესებულებები, რომლებიც ქალაქ ბათუმის მუნიციპალიტეტის ტერიტორიაზე, მათ შორის კერძო საკუთრებაში წარმოქმნიან საყოფაცხოვრებო ნარჩენებს.

2. ორგანიზებული ბაზრობების შემთხვევაში მოსაკრებლის გადამხდელია ორგანიზებული ბაზრობისა და სავაჭრო ცენტრების მომწყობი პირი.

მუხლი 4. მოსაკრებლის განაკვეთი, მისი გამოანგარიშებისა და გადახდის წესი

1. მოსაკრებლის ოდენობა გაიანგარიშება მოსახლეობისათვის სულადობის მიხედვით, ხოლო ორგანიზაციების, დაწესებულებებისა და იურიდიული პირებისათვის – ნარჩენების დაგროვების ნორმის, ნარჩენების გატანის ღირებულებისა და შესაბამისი ზომის ერთეულის კომბინაციით, კერძოდ:

ა) მოსახლეობისათვის – ერთ სულ მოსახლეზე – 1,30 ლარი თვეში;

ბ) მოსახლეობისთვის, რომელთა ოჯახის სარეიტინგო ქულა 70 000 ან 70 000-ზე დაბალია - 1,00 ლარი თვეში;

გ) იურიდიული პირების, ორგანიზაციებისა და დაწესებულებებისათვის მოსაკრებლის რაოდენობა თვეში გაიანგარიშება შემდეგი ფორმულით:

$$M = (N \times C \times K) / 12;$$

M – მოსაკრებლის რაოდენობა თვეში;

N – ნარჩენების დაგროვების ნორმატივი წელიწადში;

C – 1მ³ ნარჩენის გატანის ღირებულება, C = 9,00 ლარი;

K – ზომის ერთეული (დაკავებული ფართი, მომხმარებელთა რაოდენობა, ადგილი, საწოლი).

2. იმ იურიდიული პირებისათვის, რომელთა საქმიანობაც მოიცავს სხვადასხვა სფეროს, მოსაკრებლის გაანგარიშება მოხდება კომპლექსურად (ცალკეული საქმიანობის სფეროებიდან გამომდინარე გადასახდელ მოსაკრებელთა ჯამი) მოქმედი ფორმულის შესაბამისად.

3. ორგანიზებული ბაზრობისა და სავაჭრო ცენტრებისთვის დასუფთავების მოსაკრებელი განისაზღვრება კომპლექსურად (არსებული ცალკეული სავაჭრო ან/და მომსახურების ობიექტებიდან გამომდინარე გადასახდელ მოსაკრებელთა ჯამი).

4. საგანმანათლებლო დაწესებულებებში დასუფთავების მოსაკრებელი განისაზღვრება აღსაზრდელების/მოსწავლეების/სტუდენტების და დასაქმებულ პირთა საერთო რაოდენობის გათვალისწინებით;

5. ქ. ბათუმის მოსახლეობისათვის მოსაკრებლის გადახდის ქვითარი გამოიწერება იმ უძრავი ქონების მესაკუთრეზე, რომლის საკუთრებაშიც წამოიქმნება საყოფაცხოვრებო ნარჩენები.

6. საყოფაცხოვრებო ნარჩენების წარმომქმნელი პირები, რომლებსაც არ გააჩნიათ ელექტროენერგიის მრიცხველი, დასუფთავების მოსაკრებელი დაერიცხებათ იმ აბონენტზე, რომლითაც მარაგდებიან ელექტროენერგიით ან/და იხდიან ელექტროენერგიის გადასახადს.

7. ამ მუხლის მე-6 პუნქტით გათვალისწინებულ შემთხვევაში მოსაკრებლის გადახდის ქვითარი ორგანიზაციების, იურიდიული პირებისათვის, ინდივიდუალური მეწარმისა და დაწესებულებებისათვის გამოიწერება აბონენტის (ელექტროენერგიის მრიცხველის მესაკუთრის) სახელზე.

8. იმ საცხოვრებელ ფართზე, სადაც რეგისტრირებულია ერთზე მეტი მრიცხველი, მოსაკრებელი დაერიცხება ერთ-ერთ მრიცხველს, ხოლო აღნიშნულ მისამართზე არსებულ სხვა მრიცხველებზე დასახლებული ტერიტორიის დასუფთავებისათვის მოსაკრებლის დარიცხვა არ განხორციელდება, თუ არ გამოვლინდება სხვა გარემოება (მესამე პირისთვის საყოფაცხოვრებო ფართის ქირავნობით, გირავნობით ან სხვა ფორმით სარგებლობაში გადაცემის ფაქტი).

9. ამხანაგობის შემთხვევაში, ამხანაგობის ყველა წევრთა თანხმობისას, ქვითარი გამოიწერება ამხანაგობის სახელზე. ამ შემთხვევაში ამხანაგობა წერილობით მიმართავს სამსახურს და წარუდგენს ყველა მესაკუთრის თანხმობის დამადასტურებელ საბუთს.

10. მოსაკრებლის გადახდის ქვითარი ორგანიზაციების, იურიდიული პირებისათვის, ინდივიდუალური მეწარმისა და დაწესებულებებისათვის გამოიწერება იმ ორგანიზაციის, დაწესებულების, ინდივიდუალური მეწარმისა და იურიდიული პირის სახელზე, რომლის საქმიანობის შედეგად წარმოიქმნა საყოფაცხოვრებო ნარჩენი.

11. მოსაკრებელი შეიძლება გადახდილ იქნეს მოსაკრებლის გადამხდელის ან ნებისმიერი სხვა პირის მიერ.

12. ნარჩენების წარმომქმნელი ფიზიკური პირების რაოდენობის შეცვლის შემთხვევაში მიმდინარე თვის მოსაკრებელი იფარება ცვლილების გაუთვალისწინებლად.

13. მესაკუთრის შეცვლის შემთხვევაში ყოფილმა მესაკუთრემ, მოიჯარემ ან მოსარგებლემ მოსაკრებლის მიმდინარე დავალიანება უნდა დაფაროს იმ თვის ბოლომდე, რომელშიც მოხდა საკუთრების გადაცემა/დაბრუნება, წინააღმდეგ

შემთხვევაში აბონენტზე არსებული მოსაკრებლის დავალიანების გადახდის ვალდებულება დაეკისრება ახალ მესაკუთრეს.

14. მოიჯარის ან მოსარგებლის მიერ დავალიანების გადაუხდელობის შემთხვევაში დავალიანების გადახდის ვალდებულება ეკისრება მესაკუთრეს.

მუხლი 5. მოსაკრებლის გადახდის ვალდებულების წარმოქმნა, შეცვლა და მისგან გათავისუფლება

1. მოსაკრებლის გადახდის ვალდებულება წარმოიქმნება ფიზიკური პირებისათვის (გარდა ინდივიდუალური მეწარმეებისა) – მომსახურების ერთი თვის განმავლობაში მიღების შემთხვევაში. ორგანიზაციების, დაწესებულებების, ინდივიდუალური მეწარმეებისა და იურიდიული პირებისათვის – მომსახურების მიღებისთანავე.

2. მოსაკრებლის გადახდის ვალდებულებისაგან გათავისუფლებულია ის ფიზიკური პირი, რომელიც ცხოვრობს სასტუმროს ტიპის საცხოვრებელში, იმ შემთხვევაში, თუ ეს უკანასკნელი თვითონ სარგებლობს მოსაკრებლის გადახდევინებისათვის პასუხისმგებელი სამსახურის ან საამისოდ უფლებამოსილი ოპერატორის მომსახურებით;

3. მოსაკრებლის გადახდის ვალდებულება წყდება ფიზიკური და იურიდიული პირების, ორგანიზაციებისა და დაწესებულებების მიერ ქ. ბათუმში ნარჩენების წარმოქმნის შეწყვეტისთანავე.

4. დასუფთავების მოსაკრებელი არ დაერიცხება საწარმოო ობიექტებისა და ორგანიზაციების შენობა-ნაგებობების ფართს ან მათ ნაწილს, ღია ტერიტორიების ფართს ან მათ ნაწილს, რომლებიც არ ფუნქციონირებს, გამოუყენებელია და არ წარმოიქმნება ნარჩენი, ასევე არ დაერიცხება დასუფთავების მოსაკრებელი შემდეგ ინფრასტრუქტურის ფართზე: დამხმარე სამეურნეო ნაგებობა, ავტოსადგომი, შიდა ბიბლიოთეკა, საქვაბე, შიდა მომსახურებისათვის სამრეცხაო, კვებისათვის განკუთვნილი იზოლირებული ფართი, სკვერი.

5. მომსახურების ორგანიზების ერთ თვეზე მეტი ხნით შეწყვეტის შემთხვევაში, მოსაკრებლის გადამხდელის მოთხოვნით გადასახდელი თანხა შესაძლებელია შემცირდეს ამ პერიოდში გადასახდელი მოსაკრებლის ოდენობით.

6. მომსახურების ორგანიზების შეფერხების, შეზღუდვის, დაგვიანების, აგრეთვე მომსახურების ერთ თვეზე ნაკლები დროის განმავლობაში შეწყვეტის შემთხვევაში მოსაკრებლის გადამხდელს არ აქვს უფლება მოითხოვოს მოსაკრებლის განაკვეთის გადახდისაგან გათავისუფლება ან მისი განაკვეთის შემცირება.

7. ნარჩენების წარმოქმნელის მიერ ნარჩენების წარმოქმნის ადგილის შეცვლის შემთხვევაში მოსაკრებელი გადაიხდება ნარჩენების წარმოქმნის იმ ადგილის მიხედვით, სადაც მიიღო მომსახურების 50%-ზე მეტი.

8. სახელმწიფო, ავტონომიური რესპუბლიკისა და ადგილობრივი თვითმმართველობის ორგანოები და მათ მიერ დაფუძნებული საჯარო და კერძო სამართლის სამეწარმეო (50%-ზე მეტი წილობრივი მონაწილეობით) და არასამეწარმეო (არაკომერციული) იურიდიული პირები სარგებლობენ მოსაკრებლის გადახდის 50%-იანი შეღავათით.

9. მოსაკრებლის გადახდისაგან გათავისუფლებულია ქ. ბათუმში არსებული მოხუცთა და ბავშვთა თავშესაფრები და უფასო სასადილოები.

მუხლი 6. მოსაკრებლის ბიუჯეტში ჩარიცხვის წესი

1. მოსაკრებელი მთლიანად ჩაირიცხება ქ. ბათუმის მუნიციპალიტეტის ადგილობრივ ბიუჯეტში.

2. მუნიციპალიტეტის ორგანოს საამისოდ უფლებამოსილ სამსახურს შეუძლია ადგილობრივი მოსაკრებლის ამოღების მიზნით შესაბამის იურიდიულ პირთან გააფორმოს ხელშეკრულება.

მუხლი 7. მოსაკრებლის გადახდის პერიოდულობა და ვადები

1. მოსაკრებლის გადახდა წარმოებს შესაბამის ანგარიშზე ქვითრის ან ელექტრონული ანგარიშსწორების საშუალებით.
2. ქვითრის სავალდებულო რეკვიზიტებია:
 - ა) მოსაკრებლის გადამხდელი;
 - ბ) მოსაკრებლის გადამხდელის მონაცემები;
 - გ) გადასახდელი თანხა;
 - დ) გადახდის ვადა.
3. მოსაკრებელი გადაიხდევინება ყოველთვიურად, თვეში ერთხელ.
4. გადამხდელს შეუძლია მოსაკრებელი გადაიხადოს წინასწარ.
5. დაწესებულებებს, ორგანიზაციებს, ინდივიდუალურ მეწარმეებს, იურიდიულ პირებს, რომელთაც დასუფთავების მოსაკრებელი დაერიცხათ მომსახურების მიღების მთელს პერიოდზე, მაგრამ არანაკლებ ორი თვისა, მიეცეთ უფლება მომსახურების მიღების მთელს პერიოდზე დარიცხული მოსაკრებლის (მოსაკრებლის მიმდინარე ყოველთვიურ დარიცხვასთან ერთად) დავალიანება დაფარონ მოსაკრებლის დარიცხვიდან არაუმეტეს 12 თვის ვადაში, შესაბამის სამსახურთან ან/და ოპერატორთან გაფორმებული შეთანხმების საფუძველზე, ხოლო ფიზიკური პირებისთვის (გარდა ინდივიდუალური მეწარმისა) დავალიანების დაფარვის პერიოდი განისაზღვროს არაუმეტეს 24 თვის ვადით.

მუხლი 8. მოსაკრებლის გადამხდელთა უფლებები და მოვალეობები

1. ქალაქ ბათუმის ტერიტორიაზე მდებარე საცხოვრებელი ბინის/სახლის მესაკუთრე, ასევე მოქმედი ინდივიდუალური მეწარმე, იურიდიული პირი, ორგანიზაცია და დაწესებულება ვალდებულია ქ. ბათუმის მუნიციპალიტეტის მერიის შესაბამის სამსახურში ან ოპერატორთან დარეგისტრირდეს მოსაკრებლის გადამხდელად. წინამდებარე წესის ამოქმედების დღიდან აღნიშნული პირები ავტომატურად ითვლებიან მომსახურების მიმღებებად.
2. ქალაქ ბათუმის ტერიტორიაზე მდებარე საცხოვრებელი ბინის/სახლის მესაკუთრე (გარდა ინდივიდუალური მეწარმისა), ვალდებულია რეგისტრაცია გაუკეთოს მის საკუთრებაზე მცხოვრები პირების რაოდენობას. მესაკუთრე ფიზიკური პირი, რომლის საკუთრებაშიც წარმოიქმნება ნარჩენი ვალდებულება წარმოიქმნელთა რაოდენობის ცვლილების შესახებ დაუყოვნებლივ ან/და არაუმეტეს 30 კალენდარული დღისა აცნობოს სამსახურს ან ოპერატორს, რომელიც გავლენას მოახდენს გადასახდელი მოსაკრებლის გაანგარიშებაზე. აბონენტი ვალდებულია წარმოადგინოს ცვლილების დამადასტურებელი უტყუარი დოკუმენტი.
3. იმ შემთხვევაში, თუ აბონენტმა თანხა გადაიხადა ძველ მისამართზე, ცვლილების შემთხვევაში ახალ მისამართზე დარიცხული მოსაკრებლის გადახდის ვალდებულება წარმოექმნება მომავალი თვიდან. იმ მისამართებზე, სადაც ვერ დგინდება კონკრეტულ საცხოვრებელ ფართში რეგისტრირებულ პირთა რაოდენობა, მოსაკრებლის კორექტირება მიმდინარე პერიოდიდან განხორციელდება ბინათმესაკუთრეთა ამხანაგობის ნოტარიულად დამოწმებული კრების ოქმის საფუძველზე.
4. ქალაქ ბათუმის მუნიციპალიტეტის ტერიტორიაზე არსებულ საცხოვრებელ ფართში (მოსახლეობის კატეგორიის აბონენტზე), სადაც დასტურდება ცხოვრების ფაქტი, მაგრამ არ არის რეგისტრირებული არც ერთი ფიზიკური პირი, დასუფთავების მოსაკრებელი დაერიცხებათ, როგორც ერთ სულ მოსახლეს თვეში - 1,30 ლარის ოდენობით. საცხოვრებელ ფართზე ცხოვრების ფაქტი დადასტურებულად ჩაითვლება ქ. ბათუმის მუნიციპალიტეტის მერიის მიერ დამტკიცებული წესის შესაბამისად. იმ შემთხვევაში თუ სახელმწიფო სერვისების სააგენტოს მიერ გაცემული ინფორმაციის საფუძველზე დადასტურდება ერთზე მეტი პირის რეგისტრაცია, შესაბამისი პირის რეგისტრაციის პერიოდიდან განხორციელდება სულადობისა და დასარიცხი ტარიფის კორექტირება.

5. ქალაქ ბათუმის ტერიტორიაზე მდებარე საცხოვრებელი ბინის/სახლის მესაკუთრეები, დაწესებულებები, ორგანიზაციები, იურიდიული პირები და ინდივიდუალური მეწარმეები, ასევე ნარჩენების წარმომქმნელი და/ან მფლობელი პირები ვალდებული არიან სამსახურის ან ოპერატორის მიერ დადგენილ გონივრულ ვადაში, მაგრამ არა უმეტეს 30 კალენდარული დღისა, გასცენ ნარჩენების გატანისათვის საჭირო ნებისმიერი სახის ინფორმაცია, რამაც შესაძლებელია გავლენა იქონიოს სამსახურის ან ოპერატორის მიერ ამ მომსახურების მიწოდების ხარისხზე და მოცულობაზე.

6. დაწესებულებები, ორგანიზაციები, იურიდიული პირები და ინდივიდუალური მეწარმეები ვალდებული არიან დადგენილი წესით რეგისტრაციიდან ან შექმნის შესახებ ადმინისტრაციულ-სამართლებრივი აქტის ძალაში შესვლის დღიდან (აგრეთვე რეორგანიზაციის, ლიკვიდაციის, საქმიანობის პროფილის, მისამართის, ადგილმდებარეობის და ნებისმიერი სახის ცვლილების შემთხვევაში) არაუგვიანეს 30 კალენდარული დღისა, აღნიშნულის თაობაზე აცნობონ სამსახურს ან ოპერატორს. მიუხედავად შეტყობინების განხორციელების დღისა, დაწესებულებები, ორგანიზაციები, იურიდიული პირები და ინდივიდუალური მეწარმეები ვალდებული არიან მოსაკრებელი გადაიხადონ მომსახურების მიღების მთელ პერიოდზე.

7. დასუფთავების მოსაკრებლის გადამხდელად დარეგისტრირებისათვის დაწესებულებები, ორგანიზაციები, იურიდიული პირები და ინდივიდუალური მეწარმეები ვალდებული არიან წარმოადგინონ კონკრეტულ მისამართზე (ფართზე) მათი ფუნქციონირების დაწყების დამადასტურებელი დოკუმენტები. მიუხედავად შეტყობინების განხორციელების დღისა, დაწესებულებები, ორგანიზაციები, იურიდიული პირები და ინდივიდუალური მეწარმეები ვალდებული არიან მოსაკრებელი გადაიხადონ მომსახურების მიღების მთელ პერიოდზე.

8. დასუფთავების მოსაკრებლის გადამხდელად დარეგისტრირებული მომხმარებლების მიერ, ფაქტობრივად დაკავებულ ფართში განხორციელებული ნებისმიერი სახის ცვლილების შემთხვევაში (რამაც შესაძლებელია გავლენა იქონიოს სამსახურის ან ოპერატორის მიერ ამ მომსახურების მიწოდების ხარისხზე და მოცულობაზე), მათზე დარიცხულ მოსაკრებელში ცვლილების (კორექტირების) შეტანის მიზნით ვალდებული არიან არაუგვიანეს 30 კალენდარული დღისა, აღნიშნულის თაობაზე აცნობონ სამსახურს ან ოპერატორს და წარმოადგინონ მათ მიერ დაკავებულ ფართში ცვლილების დამადასტურებელი დოკუმენტები; მიუხედავად შეტყობინების განხორციელების დღისა, დასუფთავების მოსაკრებლის გადამხდელად დარეგისტრირებული მომხმარებლები ვალდებული არიან მოსაკრებელი გადაიხადონ გაზრდილი მომსახურების მიღების მთელ პერიოდზე.

9. დაწესებულებები, ორგანიზაციები, იურიდიული პირები და ინდივიდუალური მეწარმეები ვალდებული არიან საქმიანობის შეწყვეტის შესახებ არაუგვიანეს 30 კალენდარული დღისა, აღნიშნულის თაობაზე აცნობონ სამსახურს ან ოპერატორს და წარმოადგინონ კონკრეტულ მისამართზე (ფართში) საქმიანობის შეწყვეტის უტყუარი დამადასტურებელი დოკუმენტი (სახელმწიფო ან სხვა კომპეტენტური ორგანოების მიერ გაცემული დოკუმენტი). საქმიანობის შეწყვეტის უტყუარი დამადასტურებელი დოკუმენტების წარმოდგენლობის შემთხვევაში დასუფთავების მოსაკრებლის დარიცხვის შეწყვეტა განხორციელდება სამსახურის ან ოპერატორისადმი შეტყობინების განხორციელების დღიდან ან შესაბამისად უფლებამოსილი პირების მიერ ინსპექტირების შედეგად, ობიექტის ფუნქციონირების შეწყვეტის ფაქტის დადასტურების საფუძველზე შედგენილი შემოწმების აქტის თარიღიდან, ასევე შესაბამისი დოკუმენტაციის წარმოდგენის საფუძველზე ეკონომიკური საქმიანობის შეწყვეტის დღიდან.

10. ორგანიზებული ბაზრობის და სავაჭრო ცენტრების მომწყობი პირი ვალდებულია წარუდგინოს შესაბამის სამსახურს ან ოპერატორს ინფორმაცია ბაზრობებისა და სავაჭრო ცენტრების არსებული სავაჭრო ან/და მომსახურების ობიექტების საქმიანობის სფეროს და დაკავებული ფართობის შესახებ.

11. წინამდებარე წესების შესრულებაზე კონტროლის განხორციელების მიზნით უფლებამოსილ პირს/პირებს დამადასტურებელი დოკუმენტის წარდგენის შემთხვევაში უფლება აქვს შეუფერხებლად შევიდეს ნარჩენების წარმომქმნელი პირების ტერიტორიაზე, ხოლო ნარჩენების წარმომქმნელი პირი ვალდებულია რეაგირების მიზნით დროულად (არა უმეტეს 5 სამუშაო დღისა) წარუდგინოს შესაბამისი ინფორმაცია და დოკუმენტაცია. ნარჩენების წარმომქმნელი სუბიექტების ტექნიკურ მაჩვენებლებში არასწორი, არასრულყოფილი ინფორმაციის მითითებისა ან/და არასწორი, არასაკმარისი საჭირო დოკუმენტაციის წარმოდგენის შემთხვევაში პასუხისმგებლობა ეკისრება ნარჩენების წარმომქმნელ პირს.

მუხლი 9. პასუხისმგებლობა მოსაკრებლის გადახდევენებისათვის

1. მოსაკრებლების გადახდევენებაზე პასუხისმგებლობა ეკისრება ქ. ბათუმის მუნიციპალიტეტის მერიის შესაბამის სამსახურს ან/და შესაბამის ოპერატორს ქ. ბათუმის მუნიციპალიტეტთან გაფორმებული ხელშეკრულების საფუძველზე.

2. ქ. ბათუმის მუნიციპალიტეტის მერიის მიერ მოსაკრებლის ამოსაღებად იურიდიულ პირებთან ხელშეკრულების გაფორმების შემთხვევაში მოსაკრებელი გადაიხდება მოცემული ინსტრუქციის შესაბამისად.

გ ა ნ მ ა რ ტ ე ბ ი თ ი ბ ა რ ა თ ი

პროექტის სახელწოდება და სათაური

„ქ. ბათუმის მუნიციპალიტეტში დასახლებული ტერიტორიის დასუფთავებისათვის მოსაკრებლის შემოღების და გადახდის ინსტრუქციის დამტკიცების შესახებ“ ქალაქ

ბათუმის მუნიციპალიტეტის საკრებულოს 2016 წლის 29 იანვრის №3

დადგენილებაში ცვლილების შეტანის თაობაზე“ ქალაქ ბათუმის მუნიციპალიტეტის საკრებულოს დადგენილების პროექტი

ა) ზოგადი ინფორმაცია პროექტის შესახებ

ა.ა) პროექტის მიღების მიზეზი და მიზანი:

დადგენილების ახალი პროექტით გათვალისწინებული რიგი ცვლილებები, რომელიც განპირობებულია მრავალწლიანი პრაქტიკული გამოცდილებიდან და მიმდინარე ეტაპისთვის არსებული გარემოებების აუცილებლობიდან, რაც საშუალებას იძლევა უფრო პრაქტიკული, ხელმისაწვდომი, მარტივი და დახვეწილი გახდეს ყველა პროცედურა მოსაკრებლის ადმინისტრირების ღონისძიებების პროცესში მონაწილე ფიზიკური და/ან იურიდიული პირები, სახელმწიფო ორგანიზაციები და ა.შ. (როგორც ღონისძიებების გამტარებელი ადმინისტრაციული ორგანოები, ასევე აბონენტები).

ცვლილებები დადგენილების ინსტრუქციის ნაწილში:

1-ლი მუხლის მე-3 პუნქტით მოხდა მოსაკრებლის განმარტების დაზუსტება;

მე-2 მუხლით დაემატა ტერმინთა განმარტებები, რითაც კონკრეტდება ინსტრუქციის, ტარიფების, საქმიანობის სფეროსა და დაანგარიშების ერთეულში მოსაზრებული ზოგადი სიტყვითი მნიშვნელობა (მაგ: საწოლი, დასაჯდომი ადგილი, აპარტამენტი, აბონენტი და ა.შ.)

მე-3 მუხლის მე-2 პუნქტში დაემატა ჩანაწერი - სავაჭრო ცენტრების მომწყობი პირი (წინა მდებარე დადგენილებაში ნახსენები იყო მხოლოდ ბაზრობები);

მე-4 მუხლის მე-3 პუნქტში ჩანაწერი - სავაჭრო ცენტრების მომწყობი პირი (წინა მდებარე დადგენილებაში ნახსენები იყო მხოლოდ ბაზრობები);

მე-4 მუხლის მე-4 პუნქტით გაჩნდა ახალი ჩანაწერი, რომელიც გულისხმობს საგანმანათლებლო დაწესებულებებში მოსაკრებლის განსაზღვრას აღსაზრდელების/მოსწავლეების/სტუდენტების და დასაქმებულ პირთა საერთო რაოდენობის გათვალისწინებით;

გამომდინარე იქედან, რომ მიმდინარე ეტაპისთვის მოსაკრებლის ადმინისტრირების შესაბამის მომსახურებას გვიწევს სს „ენერგო-პრო ჯორჯია“, განხორციელდა შემდეგი ცვლილებები, კერძოდ:

მე-4 მუხლის მე-6 პუნქტით საყოფაცხოვრებო ნარჩენების წარმომქმნელი პირები, რომლებსაც არ გააჩნიათ ელექტროენერგიის მრიცხველი, დასუფთავების მოსაკრებელი დაერიცხებათ იმ აბონენტზე, რომლითაც მარაგდებიან ელექტროენერგიით ან/და იხდიან ელექტროენერგიის გადასახადს;

მე-4 მუხლის მე-7 პუნქტით ამ მუხლის მე-6 პუნქტით გათვალისწინებულ შემთხვევაში მოსაკრებლის გადახდის ქვითარი ორგანიზაციების, იურიდიული პირებისათვის, ინდივიდუალური მეწარმისა და დაწესებულებებისათვის გამოიწერება აბონენტის (ელექტროენერგიის მრიცხველის მესაკუთრის) სახელზე.

მე-4 მუხლის მე-8 პუნქტით იმ საცხოვრებელ ფართზე, სადაც რეგისტრირებულია ერთზე მეტი მრიცხველი, მოსაკრებელი დაერიცხება ერთ-ერთ მრიცხველს, ხოლო აღნიშნულ მისამართზე არსებულ სხვა მრიცხველებზე დასახლებული ტერიტორიის დასუფთავებისათვის მოსაკრებლის დარიცხვა არ განხორციელდება, თუ არ გამოვლინდება სხვა გარემოება (მესამე პირისთვის საყოფაცხოვრებო ფართის ქირავნობით, გირავნობით ან სხვა ფორმით სარგებლობაში გადაცემის ფაქტი);

მე-4 მუხლის მე-13 პუნქტით დაემატა ახალი ჩანაწერი, დავალიანების არსებობის შემთხვევაში, მისი გადახდის ვალდებულება წარმოექმნება ახალ მესაკუთრეს;

მე-5 მუხლის მე-4 პუნქტით განისაზღვრა ის საქმიანობები, რაზეც არ დაერიცხება კომერციულ აბონენტებს და სხვა მსგავსი ჩანაწერები ამოღებულ იქნა დანართი 2-ით განსაზღვრულ ტარიფებში (შენობა-ნაგებობების ფართს ან მათ ნაწილს, ღია ტერიტორიების ფართს ან მათ ნაწილს, რომლებიც არ ფუნქციონირებს, გამოუყენებელია და არ წარმოიქმნება ნარჩენი, ასევე არ დაერიცხება დასუფთავების მოსაკრებელი შემდეგ ინფრასტრუქტურის ფართზე: დამხმარე სამეურნეო ნაგებობა, ავტოსადგომი, შიდა ბიბლიოთეკა, საქვამე, შიდა მომსახურებისათვის სამრეცხაო, კვებისათვის განკუთვნილი იზოლირებული ფართი, სკვერი);

გამომდინარე იქედან, რომ ფიზიკურ პირებზე დარიცხვა წარმოებს სერვისების განვითარების სააგენტოს მიერ მოწოდებულ ინფორმაციაზე დაყრდნობით (რეგისტრირებულ პირთა რაოდენობის შესაბამისად), ძველი დადგენილებიდან ამოღებულ იქნა ჩანაწერი, სადაც სულადობის ცვლილება შესაძლებელი იყო გაცემული ვიზით, ამხანაგობის ცნობით, სამგზავრო ბილეთით და ა.შ.)

მე-5 მუხლის მე-9 პუნქტში, მოსაკრებლის გადახდის ვალდებულებისაგან გათავისუფლება შეეხო ასევე უფასო სასადილოებს;

ამოღებულია ძველი დადგენილების მე-4 მუხლის მე-9 და მე-10 პუნქტები, რომელიც გულისხმობდა დასუფთავების სერვისის არ მიწოდების გამო მათ დროებით გათავისუფლებას. მიმდინარე ეტაპისთვის ქ. ბათუმის მუნიციპალიტეტის ადმინისტრაციული საზღვრების თითქმის სრული ტერიტორიაა ათვისებული, გამომდინარე აქედან, არ საჭიროებს შესაბამისი ჩანაწერები.

ძველი დადგენილების მე-6 მუხლის მე-2 პუნქტის „ე“ ქვე პუნქტი ამოღებული, როგორც ქვითრის აუცილებელი რეკვიზიტი - გადახდის ადგილი;

მე-7 მუხლის მე-5 პუნქტით, რაც ეხება დავალიანების არაუმეტეს 12 თვიანი გრაფიკით გადახდას, დაემატა ჩანაწერი, რითაც ფიზიკურ პირებს (გარდა მეწარმეებისა) შეუძლიათ ისარგებლონ დავალიანების გადახდის 24 თვიანი გრაფიკით;

ძველი დადგენილების მე-7 მუხლის მე-2 პუნქტით, სულადობის ცვლილებასთან დაკავშირებით დოკუმენტაციის ჩამონათვალიდან ამოღებულ იქნა ჩანაწერები (ცნობა სასწავლებლიდან, გარდაცვალების და დაბადების მოწმობა, 3 მეზობლის ხელწერა და ა.შ.), ასევე გაიზარდა მომართვისთვის აუცილებელი ვადა;

მე-8 მუხლის მე-2 პუნქტით გაიზარდა სულადობის ცვლილებისთვის მომართვის ვადა;

მე-8 მუხლის მე-3 პუნქტით გაჩნდა ჩანაწერი, სადაც ვერ დგინდება კონკრეტულ ფართში რეგისტრირებულ სულადობის რაოდენობა, შესაბამისი ცვლილება განხორციელდება ნოტარიულად დამოწმებული ამხანაგობის თავმჯდომარის ცნობა (ძირითადად ეხება ე.წ. იტალიურ ეზოს“ მსგავს დასახლებებს);

მე-8 მუხლის მე-4 პუნქტით დაემატა მუნიციპალიტეტის მერის შესაბამისი ბრძანების (ცხოვრების ფაქტის დადასტურების შესახებ) შესაბამისად, სადაც ვერ დაზუსტდება რეგისტრირებულ პირთა რაოდენობა, დაერიცხება 1 სულზე (20 კვტ/სთ მოხმარების და ა.შ შემთხვევაში, იხ. ბრძანების პროექტი). ხოლო იმ შემთხვევაში თუ სახელმწიფო სერვისების სააგენტოს მიერ გაცემული ინფორმაციის საფუძველზე დადასტურდება ერთზე მეტი პირის რეგისტრაცია, შესაბამისი პირის რეგისტრაციის პერიოდიდან განხორციელდება სულადობისა და დასარიცხი ტარიფის კორექტირება.

მე-8 მუხლის მე-5 პუნქტით გაიზარდა იმ ინფორმაციის შესახებ მიწოდება, რამაც შესაძლებელია გავლენა იქონიოს სამსახურის ან ოპერატორის მიერ ამ მომსახურების მიწოდების ხარისხზე და მოცულობაზე.

მე-8 მუხლის მე-8 და მე-9 პუნქტით გაიზარდა ვადა საქმიანობის შეჩერებისა და საქმიანობის ტიპის და/ან დაანგარიშების ერთეული ცვლილების შესახებ, ასევე მე-9 პუნქტში გაჩნდა ჩანაწერი, რაც იძლევა საშუალებას სუბიექტის მიერ არ მომართვის შედეგად დარიცხული მოსაკრებლის გადაანგარიშების/დაკორექტირების შესახებ, შესაბამისი დოკუმენტაციის წარმოდგენით (ძირითადად ეხება სეზონურ ობიექტებს);

მე-8 მუხლის მე-10 პუნქტში დაემატა - სავაჭრო ცენტრების მომწყობი პირი (წინა მდებარე დადგენილებაში ნახსენები იყო მხოლოდ ბაზრობები);

მე-8 მუხლის მე-11 პუნქტში დაემატა ნარჩენების წარმომქმნელი პირის ვალდებულება რეაგირების მიზნით დროულად (არა უმეტეს 5 სამუშაო დღისა) წარუდგინოს შესაბამისი ინფორმაცია და დოკუმენტაცია. ნარჩენების წარმომქმნელი სუბიექტების ტექნიკურ მაჩვენებლებში არასწორი, არასრულყოფილი ინფორმაციის მითითებისა ან/და არასწორი, არასაკმარისი საჭირო დოკუმენტაციის წარმოდგენის შემთხვევაში პასუხისმგებლობა ეკისრება ნარჩენების წარმომქმნელ პირს.

დადგენილების პროექტის დანართი 2-ში (საქმიანობის ტიპები და ტარიფები) გათვალისწინებულია შემდეგი ცვლილებები:

ინსტრუქციის მე-5 მუხლის მე-4 პუნქტით განისაზღვრა შესაბამისი ტერიტორიები, რა ფართზეც არ უნდა დაერიცხოთ სამეწარმეო სუბიექტებს, შესაბამისად ახალი დადგენილების დანართი 2-ში აღარ ფიქსირდება შესაბამისი ჩანაწერები;

მე-2 კატეგორიაში დაემატა ჩანაწერი სპეციალიზირებული სახელოვნებო, საგანმანათლებლო დაწესებულებები

მე-4 კატეგორიაზე (კონოთეატრები და თეატრები) ნაცვლად გაყიდული ბილეთების რაოდენობისა, ზომის ერთეულად ფიქსირდება მაყურებლის ერთი სავარძელი, ტარიფით - 0,45 ლარი, რაც გაამარტივებს დარიცხვის პროცედურას და ოდენობის დაზუსტებას (იქნება ფიქსირებული);

მე-6 კატეგორიას (სასტუმროები) დაემატა სასტუმროს ტიპის საერთო საცხოვრებლების კატეგორია. აქ გათვალისწინებულია ე.წ. აპარტოტელების მქონე შენობები, რომელსაც გააჩნია მიმღები, რეგისტრატურა და ა.შ. (მაგ: ორბი რეზიდენსი, მერიოტი და ა.შ.);

მე-7 კატეგორიას (საავადმყოფოები) დაემატა სამშობიარო სახლები;

მე-8 კატეგორიას (პოლიკლინიკები) დაემატა ლაბორატორიები;

მე-9 კატეგორიას (სტადიონები) დაემატა საჯინიბოები და კორტები;

მე-10 კატეგორიიდან ამოღებულ იქნა „მარკეტი“.

მე-11 კატეგორიას (სამრეწველო მაღაზია) დაემატა ბირჟები, საიუველირო, თამბაქოს და ანტიკვარიატის მაღაზიები, ვეტერინარული ცენტრები. ზოომაღაზიები, ყვავილების მაღაზიები;

მე-12 კატეგორიიდან ამოღებულ იქნა დახურული ტიპის ყვავილების მაღაზიის კატეგორია (ამ კატეგორიაზე განხორციელდება მე-11 კატეგორიით გათვალისწინებული ტარიფი), ასევე ამ კატეგორიაზე (აგრარული და შერეული ბაზრები, ღია ტიპის ყვავილების მაღაზიები) ნაცვლად 1 სავაჭრო ადგილის (დახლის) - ტარიფი 0,18 ლარი, განისაზღვრა დაკავებული ფართით (ტარიფი 1 კვ.მ.-ზე 0,18 ლარი)

მე-15 კატეგორიით გაერთიანდა საწყობები პირდაპირი მიყიდვის გარეშე და ავტოსადგომები;

მე-16 კატეგორიას დაემატა სანერგე მეურნეობები და სათბურები, ფერმები, სასაკლაოები;

მე-17 კატეგორიას დაემატა შავი და ფერადი ლითონების მიმღები პუნქტები;

მე-18 კატეგორიას დაემატა საცურაო აუზები;

მე-19 კატეგორიას დაემატა კოსმეტოლოგიისა და ესთეტიკის ცენტრები;

23-ე კატეგორიას დაემატა საოჯახო სამზარეულოები (დასაჯდომი ადგილების გარეშე);

26-ე კატეგორიიდან ამოღებულ იქნა განმარტება - „ვაგზლები“;

დაემატა 32-ე (ინდივიდუალური საცხოვრებელი სახლის მშენებარე ობიექტი, 1 კვ.მ განაშენიანების (კ-1)) ფართზე ტარიფით 0,26 ლარი და **33-ე კატეგორია** (მრავალბინიანი საცხოვრებელი სახლის, კომერციული, საწარმოო, სამრეწველო გამოყენების, ასევე სხვა ფუნქციური დანიშნულების მშენებარე ობიექტები (გარდა ინდივიდუალური საცხოვრებელი სახლისა), 1 კვ.მ განაშენიანების (კ-1)) ფართზე ტარიფით 1,00 ლარი.

ა.ბ) პროექტის ძირითადი არსი:

„ქ. ბათუმის მუნიციპალიტეტში დასახლებული ტერიტორიის დასუფთავებისათვის მოსაკრებლის შემოღების და გადახდის ინსტრუქციის დამტკიცების შესახებ“ ქალაქ ბათუმის მუნიციპალიტეტის საკრებულოს 2016 წლის 29 იანვრის №3 დადგენილებაში ცვლილების შეტანა.

ბ) პროექტის ფინანსური დასაბუთება

ბ.ა) პროექტის მიღებასთან დაკავშირებით აუცილებელი ხარჯების დაფინანსების წყარო:
წარმოდგენილი პროექტი არ ითვალისწინებს დამატებითი ხარჯების გაწევას.

ბ.ბ) პროექტის გავლენა ბიუჯეტის საშემოსავლო და ხარჯვით ნაწილზე:

ზეგავლენას მოახდენს ბიუჯეტის საშემოსავლო ნაწილზე, შემოსავლების გაზრდის სახით.

გ) პროექტის შესაბამისობა უპირატესი იურიდიული ძალის მქონე ნორმატიულ აქტებთან:
პროექტი შეესაბამება მოქმედ კანონმდებლობას;

დ) პროექტის მომზადების პროცესში მიღებული კონსულტაციები

სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტები, სპეციალისტები, რომლებმაც მონაწილეობა მიიღეს პროექტის შემუშავებაში და მათი შეფასება პროექტის მიმართ (ასეთის არსებობის შემთხვევაში):

ე) პროექტის ავტორი:

ქალაქ ბათუმის მუნიციპალიტეტის მერიის ადმინისტრაცია.

ვ) პროექტის ინიციატორი:

ქალაქ ბათუმის მუნიციპალიტეტის მერი.

ზ) განმარტებითი ბარათის მომზადებაზე უფლებამოსილი პირის თანამდებობა, სახელი, გვარი და ხელმოწერა:

ქალაქ ბათუმის მუნიციპალიტეტის მერიის
საფინანსო-საბიუჯეტო სამსახურის უფროსის
მოვალეობის შემსრულებელი

გიორგი სურმანიძე

N	საქმიანობის სფერო	ზომის ერთეული	ნარჩენების წლიური დაგროვების ნორმა 1 კუბურ მეტრზე (N)	მოსაკრებელი 1 მ³ ნარჩენების გატანაზე (M)
1	2	3	4	5
1	მუზეუმები, ბიბლიოთეკები, არქივები	საერთო ფართის 1 მ²	0.04	0.03
2	ოფისები, სააგენტოები, პროფესიული და სახელმწიფო ორგანიზაციები, სპეციალიზებული სახელოვნებო საგანმანათლებლო დაწესებულებები	საერთო ფართის 1 მ²	0.2	0.15
3	ბანკები, საკრედიტო და საფინანსო ორგანიზაციები	საერთო ფართის 1 მ²	0.44	0.33
4	კინოთეატრები და თეატრები	მაყურებლის ერთი სავარძელი	0.6	0.45
5	სკოლები, ინსტიტუტები, კოლეჯები, საბავშვო ბაგა-ბაღები, საგანმანათლებლო დაწესებულებები	ერთი სული	0.2	0.15
6	სასტუმროები და სასტუმროს ტიპის საერთო საცხოვრებლები (ინფრასტრუქტურის ფართზე შიდა მომსახურებისათვის მოსაკრებელი არ დაირიცხება)	მომსახურების ერთეული (ერთი საწოლი)	2	1.5
7	სავადმყოფოები და სამშობიარო სახლები	მომსახურების ერთეული (ერთი საწოლი)	0.95	0.71
8	პოლიკლინიკები, სამედიცინო დიაგნოსტიკური ცენტრები, ექიმებისა და სტომატოლოგიური კაბინეტები, ლაბორატორიები	საერთო ფართის 1 მ²	0.28	0.21
9	სტადიონები, სპორტულ გამაჯანსაღებელი დაწესებულებები და მანეჟები, საჯინიზოები და კორტები (სატურნირო და სავარჯიშო მოედნების გარდა)	ღია ფართის 1 მ²	0.02	0.02
		დახურული ფართის 1 მ²	0.16	0.12
10	სასურსათო საქონლის მაღაზიები (სავაჭრო დარბაზი)	სავაჭრო ფართის 1 მ²	0.48	0.36
11	სამრეწველო საქონლის მაღაზიები და აფთიაქები, ბირჟები, საიუვილერო, თამბაქოს და ანტიკვარიატის მაღაზიები, ვეტერინარული ცენტრები. ზოომაღაზიები, ყვავილების მაღაზიები (სავაჭრო დარბაზი)	სავაჭრო ფართის 1 მ²	0.36	0.27
12	აგრარული და შერეული ბაზრები, ყვავილების ღია მაღაზიები	საერთო ფართის 1 მ²	0.24	0.18
13	შერეული საქონლის მაღაზიები	საერთო ფართის 1 მ²	0.48	0.36
14	საწყობები პირდაპირი მიყიდვის გარეშე და ავტოსადგომები	ღია ფართის 1 მ²	0.02	0.02
		დახურული ფართის 1 მ²	0.16	0.12
15	ავტოგასამართი სადგურები	საერთო ფართის 1 მ²	0.24	0.18

1	2	3	4	5
16	სატრანსპორტო საშუალებების საჩვენებელი და გასაყიდი ნაგებობები, სანერგე მეურნეობები და სათბურები, ფერმები, სასაკლაოები	ღია ფართის 1 მ ²	0.08	0.06
		დახურული ფართის 1 მ ²	0.16	0.12
17	სატრანსპორტო საშუალებების სარემონტო სადგურები, ტექ. მომსახურების ადგილები, ავტოსამრეცხაოები, შავი და ფერადი ლითონების მიმღები პუნქტები	ღია ფართის 1 მ ²	0.04	0.03
		დახურული ფართის 1 მ ²	0.16	0.12
18	აბანოები, საუნეები და საცურაო აუზები	საერთო ფართის 1 მ ²	0.32	0.24
19	სადალაქოები და სილამაზის სალონები, კოსმეტოლოგიისა და ესთეტიკის ცენტრები	საერთო ფართის 1 მ ²	0.44	0.33
20	მცირე სამეწარმეო საქმიანობა შენობის შიგნით მიმდინარე წარმოებისას, საყოფაცხოვრებო მომსახურების ობიექტები	საერთო ფართის 1 მ ²	0.36	0.27
21	რესტორნები, პიცერიები, სასადილოები, კაფეები და ბარები	ერთი ადგილი	1.35	1
22	საბანკეტო დარბაზები, სარიტუალო მომსახურებისათვის	საერთო ფართის 1 მ ²	0.4	0.3
23	საცხოვრები, საოჯახო სამზარეულოები (დასაჯდომი ადგილების გარეშე)	საერთო ფართის 1 მ ²	0.36	0.27
24	დისკოთეკები, ღამის კლუბები	საერთო ფართის 1 მ ²	0.36	0.27
25	კაზინოები, ტოტალიზატორები, სათამაშო და გასართობი ცენტრები	საერთო ფართის 1 მ ²	0.48	0.36
26	აეროპორტები, საქალაქთაშორისო და საერთაშორისო ავტოსადგურები, რკინიგზის სადგურები	ღია ფართის 1 მ ²	0.02	0.02
		დახურული ფართის 1 მ ²	0.16	0.12
27	ღია ტიპის დასვენებისა და გასართობი თავშესაფრის ადგილები, სკვერები, ბაღები, ატრაქციონები, მდინარეებზე, ტბებზე, ზღვისპირა პლაჟზე არსებული ფასიანი სანაპირო ზოლები	საერთო ფართის 1 მ ²	0.02	0.02
28	სამხედრო ნაწილები და პენიტენციური სისტემები (ინფრასტრუქტურის ფართზე მოსაკრებელი არ დაერიცხება)	ერთი ადგილი	0.6	0.45
29	საწარმოო ობიექტების ღია ტერიტორიები სადაც მიმდინარეობს საწარმოო პროცესი	საერთო ფართის 1 მ ²	0.02	0.02
30	სერიული პროდუქციის საწარმოების შენობა-ნაგებობები (საწარმოო ნარჩენების გარდა)	საერთო ფართის 1 მ ²	0.12	0.09
31	საგამოფენო და საჩვენებელი დარბაზები	საერთო ფართის 1 მ ²	0.04	0.03
32	ინდივიდუალური საცხოვრებელი სახლის მშენებარე ობიექტი	განაშენიანების კოეფიციენტის (კ-1) საანგარიშო ფართობის 1 მ ²	0.35	0.26

1	2	3	4	5
33	მრავალბინიანი საცხოვრებელი სახლის, კომერციული, საწარმოო, სამრეწველო გამოყენების, ასევე სხვა ფუნქციური დანიშნულების მშენებარე ობიექტები (გარდა ინდივიდუალური საცხოვრებელი სახლისა)	განაშენიანების კოეფიციენტის (კ-1) საანგარიშო ფართობის 1 მ²	1.34	1

მოსაკრებლის რაოდენობა თვეში (M) გაიანგარიშება შემდეგი ფორმულით:
 $M = N \times C \times K : 12$

N – ნარჩენების დაგროვების ნორმატივი წელიწადში

C – მოსაკრებელი 1 მ³ ნარჩენების გატანაზე, C=9,00 (ლარი)

K – ზომის ერთეული (დაკავებული ფართი, მომხმარებელთა რაოდენობა) .